

皇明經世文編

皇明經世文編卷之四十八

華亭

陳子龍卧子 徐孚遠闇公

編輯

宋徵璧尚木 何 剛愨人

姚 臺元可叅閱

彭文憲奏疏

疏

彭 時

災異陳言疏

比者彗星見于天田西掃太微北近紫宮其譴告警懼之至卽漢董仲舒所謂天心人愛之意也 皇上

憂切于心、戒諭群臣、同加脩省、是能體主天仁愛之心、而欲脩政以弭之、其時政得失、生民利病、文武大臣、已條陳矣、然德者政之本、書曰惟先格王、正厥事、蓋止萬事必以正君心爲本、臣等備員近輔、無以少裨實深愧懼、謹采脩德大端、安民大要、條陳如左、一曰正心術、夫天下之道、正與邪而已、正者帝王之道也、邪者異端之教也、邪正之間、治亂係焉、皇上聰明聖智、豈不知所決擇、而頗留意佛事者、聊以試之、非誠信之也、然聞者竊議以爲內府一次脩齋、街市

一次騷擾伏望 皇上留心聖學毋信異端減去內

府脩齋如遇節令止于在外寺觀舉行可也二曰謹

命令夫命令之出不可不慎 祖宗以來凡傳旨必

專任人故責有所在事無虛假近來旨意行光祿寺

內府各衙門者傳奉不一此事於平日有關係若有大故便政出多門人多詐偽將來

之弊有不可言係安危 皇上凡百事宜惟令司令監官傳

旨庶幾命出于一事有可稽而無弊矣三曰親接見

自古賢君及我 祖宗列聖未有不接大臣議論政

事者君臣情通政是以和今 皇上視朝卽退不一

接大臣。天下軍民利病。何由盡知。伏望 皇上日御
便殿。召文武大臣。忠直有識者。面議政事。而可否之。
則聽覽日熟。而治道成矣。四曰慎賞罰。夫賞罰者。人
君治天下之大柄也。慎。賞。罰。莫先於循舊章。守成憲。
近者道路傳言。謂賞典太濫。近幸無故而受金帛者
多。工匠無功。冒官職者衆。用刑太深。有法不該。充軍
而充軍者。有罪不至死而死者。此非舊章成憲所宜
也。伏望 皇上節賞慎刑。惟舊典成憲。是循是守。則
公道彰。治法正矣。五曰納諫諍。夫日有萬幾。而事有

萬變非兼聽博采。何由一一當理。伏望 皇上虛心
屈已聽受群言。勿惡其切直。勿忽其迂遠。苟有當理。
卽賜施行。如此則官賞政刑。不至乖失。而下情得以
上通矣。六曰勵官守。夫百司庶府。各有所職。承平日
久。事多因循。大槩主於奉 上。而嫌於違覆。所以事
不便于軍民者多矣。識者徒能竊議。而不敢公言。謂
目前苟安懼煩瀆也。豈知下人愁怨。以致天變如此
之甚乎。伏望 皇上戒勵各官。慎脩厥職。職股肱者
凡遇事有不便。宜再三執奏。毋率意行下。結怨于民。

司耳目者。但遇事爲民勵官。爲民蠹者卽便舉奏。毋徇情容隱。然後政善民安。爲可冀也。七曰恤軍民。近者管軍管民官員。罔體朝廷愛養軍民之心。因公科歛。弊出百端。軍民窮困。日甚一日。若此者。天下皆然而畿內尤甚。何也。以差役煩重。而又無所資以爲生也。舊日牧馬草場。積年開種田地。今多爲有力者侵占。故馬死而罪責至。地小而衣食窘。懷憤蓄怨。非一日矣。伏望皇上命該部清理三營草場。使官軍便於牧放。減退勢家莊田。使百姓便於耕種。其各處衛

所府州縣官有巧立名色掊刻軍民財物者乞令都察院嚴行禁治則軍民各得其所而邦國永寧矣。凡此七事實出輿論伏望皇上鑒除舊布新之象斷自宸衷力行新正以正心爲修德之本以餘事爲修德之助德修于上則群臣咸知效職而善政皆次第舉行矣轉災爲祥莫切於此。

民情馬政疏

今天下水旱相仍人民缺食山西河南陝西三處急於餉軍而民愈苦京畿八府迫於追馬而民愈困。

賣子女、流離道路者，在在有之。如是而不加存恤，誠恐良善化爲盜賊，則邦本動搖而事日多矣。然欲矜恤非人，賜之衣食，家與之金帛也。但省科派，減力役，寬夏秋之稅而勿徵，弛山澤之利而無禁，使民得以休息營生，是卽安養之道。惟在聖心一轉移之間耳。昔之人君有言：民吾子也。安有子倒懸而父不爲之解哉？斯言也，施於今日，尤爲切務。臣等於民情不能盡述，謹條列一二千後，伏望皇上念上天付畀之重，思下民仰賴之切，采而行之，斯民幸甚，一皇莊

之名自古無有。景泰存藩邸之舊。皇上因東宮之餘莊名曰皇固已非理。然事因其實猶爲有說。近聞故太監劉永誠所獻莊田亦欲立爲皇莊。深駭人情。居者懼於騷擾不已。耕者懼爲微科過舊。而街談巷議咸謂四海之內莫非王土。何獨以此之謂皇莊。臣等竊聞外議如此。恐不足爲聖德之光。乞以劉永誠莊田令戶部籍之。俾居民仍舊耕種。以息外議。一古者山澤之利與民共之。不爲勵禁。此先王仁民之意也。今畿內八府湖漌數多。若非官府禁地。卽爲勢

家私莊。但其間所產魚蝦螺蚌菱藕蘆葦之類。皆天地自然之利。今人民缺食。又乏倉糧賑濟。請命有司。凡所在湖澤。不分官私。許令饑民採取供食。諸人毋得禁制。及抽分稅錢。亦救荒之一端也。一編民養馬。已有定制。計馬徵駒。亦有定期。但今畿內田土日狹。人民艱窘。孳牧虧欠。遇遣官印烙。其管馬官及群長人等。因而科擾於民。實於馬無益。去冬詔令。每馬四匹。聽買一匹。恩已寬矣。然及今有司追併。尚未能買補。乞暫免今歲印烙。仍行有司暫停折買馬匹。一順

天等八府夏麥旱傷秋成未卜乞敕戶部早將夏稅勘實蠲免勿令有司催逼其他賦役有重難者許有司申達暫行減免一近者戶部以將有事河套必須軍餉遣官往山西河南陝西僱運糧草未免刻期取辦乞令督運侍郎陳俊以大軍未出宜從緩行事已起者運赴軍前未行者量爲停免庶使三處之民稍得蘇息

劉文安公奏疏

疏

劉定之

建言邊務十事疏

臣觀自古以來夷狄之禍未有盛於今日也古者如
晉懷愍之陷於匈奴宋徽欽之陷於女直其時皆因
邊塞外破藩鎮內潰救援不集播遷無所然後有蒙
塵之禍未有若今日天下之大數十萬之衆奉上
皇至於漠外委以與瓦剌者也至於晉宋既遭此禍
之後元帝繼統高宗嗣服皆舍棄故都偏安一隅然
尚能奮旣衰之勢以禦方張之敵使劉曜石勒歛於
虐燄而不入侵梓宮韋后因其講和而來歸未有今

日也。先乘勝入寇，直抵京城，奉上皇以來。而天下之大，數十萬之衆，既不能奮武以破敵，又不能約和以迎駕。聽其自來自去者也。蓋國勢之弱久矣，雖非陛下所能遽使之強，然豈可不思其自強之術而力行之乎？臣愚無知曉，敢條陳所見，以俟採擇。其一曰：戰陳臣觀昨者之戰，但知閉營堅壁，假託持重之說，而不能出奇盡力，以收勝捷之功。甚至前隊敗而後隊不救，左哨出而右哨不隨。宜倣宋吳玠、吳玠兄弟三疊陣法，前一行刀楯蹲伏以俟，其陣最低；第二行

矛戟大鎗立地以俟其陣稍高後一行騎兵弓矢其陣最高敵至得互相應援迭爲救護度幾不至狼狽。又虜騎之來奔竄唐突必資刀斧以制之。昔郭子儀破安祿山胡騎八萬用千人執長刀如雷而進韓世忠破金虜拐子馬用五百人執長斧上砍人胛下砍馬足由此言之刀斧之揮霍便捷優於大鎗之遲緩趙趙也其二曰守禦昨者紫荆居庸等關門既不能禦虜之入又不遏虜之出名爲關寨實則坦途虜騎之來若長風之驅雲霧豁然無所底礙蓋兵士寡弱

亭障缺敗。蹊隊疎漏。非朝夕之積也。今宜增兵士。繕
亭障。塞蹊隊。如古者畫境分守之時。因其陸地。則縱
橫掘塹。名爲地網。因其水泉。則遇坎停蓄。號曰水櫃。
或多植榆柳。以制奔突。或多招土兵。以助官軍。此皆
古所嘗爲。必有效驗。今武夫悍將。多云古不可多泥。
然商之賢相。不云乎。事不師古。以克永世。非說攸聞。
此臣老生腐儒之所以信其言者也。其三曰通使使。
其後興濟往而上皇歸知使職爲重。職欲其內蘊忠誠之心。外有言語之才。昔漢文帝遣
陸賈使南越。用能屈趙陀之膝。以去僭號。宋仁宗遣

富弼使契丹用能結華夷之盟以息戰爭。若陸賈富弼者。所爲蘊忠誠而能言語者也。柰何往時專以譯人駟夫爲之哉。今後宜用文武賢臣備正使之選。令通敏者爲之介紹。錄其動靜言語。纖悉必載。回日聞奏。庶乎不至招釁起戎矣。其四曰降胡。往年以來。降胡皆留居京師。授以官職。給全俸。夫非我族類。其心必異。故昨者或衝破關塞。奔歸故土。或乘伺機便。寇掠畿甸。今宜乘大兵聚集之際。遷徙其衆。遠居南土。禁其種落。不許自相婚媾。變其衣服。不許仍遵夷俗。

或以爲兵使與吾中國之兵部伍相錯以牽制之。或以爲民使與吾中國之民里甲相雜以染化之。况又省全俸給減漕輓之勞臣嘗於 皇上時言之。智謀短淺不足仰動 天聽。然今日之禍可鑑矣。其五曰練兵。夫天下之民農夫出粟紅女出布而輸納公家者多以養兵也。天下之兵受粟於倉受布於庫而練習武藝者所以爲國也。向者兵士受粟布於公門而納月錢於私室。於是乎手不習攻伐擊刺之法足不習坐作進退之宜。目不識旗幟之色耳不聞金鼓之

皇明經世編

劉文安奏疏
卷之一

九

平露堂

節。但見其或轉販貨財以爲商。或習學技藝以爲工。而工商之所得。僅足以補月錢之費。蓋民之膏血。匠之氣力。皆變爲金銀。以惠奸宄。一旦率以臨敵。如率牛羊以當虎狼。幾何其不敗哉。今宜痛革月錢之弊。作新操練之政。將帥有踵舊弊而不改者。誅之可也。怠新政而不務者。降之可也。士卒練習既久。拔其勇銳者。汰其罷軟者。糧賞有厚薄。費用可節縮矣。其六曰撫民。夫養兵之費。旣出於民。而兵敗之禍。民蒙其害。始也出費。而終也蒙害。其民何辜乎。況守令之刻

削於民。猶將帥之刻削於兵也。今宜於常年考覈之所黜落。三年內朝覲之所彈糾者。悉加嚴罰而不寬縱。至於大臣舉官有犯賊私者。必連舉主。夫恩不加於貪吏。則貪者寡矣。罰不貸於舉主。則舉者慎矣。民豈不蒙其惠乎。民安而邦本固。雖夷狄外侵。而邦本內固。此保國永世之良圖也。豈可以目前不暇而謂之緩乎。其七日選將。夫人材罕得。天之生將材。豈專此時尚多以徵侯爲大帥在於將門乎。販繪屠狗之夫。而漢賴以王。被褐捫虱之人。而秦賴以伯。至於趙括者。豈非趙奢之子。然殞

皇明經世編

劉士安奏疏
卷之一

十

平露堂

首於白起王離者豈非王翦之孫然係頸於項羽今
國家用將有出於將門之中者若石亨楊洪是也有
出於將門之外者若于謙楊善是也然將能知將宜
令其各舉所知不拘門第或以勇力或以計策其餘
公卿侍從亦令各舉所知量能而任之庶乎拔十得
五聞一知二將材由此而充矣其八曰賞罰夫有兵
將而無賞罰猶無兵將也將非賞罰無以將其兵君
非賞罰無以將其將遣石亨于謙等將兵禦虜未聞
其摧陷腥羶迎回鑾輅但迭爲勝負互相殺傷而已

雖不足罰亦不足賞也。今亨自伯爵陞爲侯爵。謙自二品陞爲一品。天下之人未聞其功。但見其賞。豈不怠忠臣義士之心乎。昔漢之圖恢復也。所恃者諸葛亮。宋之圖恢復也。所恃者張浚。其人皆忠義素著。功業久立。及至街亭之戰不勝。而亮降丞相之號。符離之役未捷。而浚解都督之職。待收後效。乃復前官。今宜使亨等但居舊職。勿授新陞。以崇廉耻之節。以作敵愾之氣。他日勛名振而爵賞加。亦何晚乎。夫旣與而不忍奪者。姑息之政也。旣進而不肯退者。患失之

心也。上不行姑息之政。下不懷患失之心。則治平可計。日而望矣。至於昨有臨陣而死者。有越關而生者。亦宜急加賞罰。庶幾恩及卑賤。則人知所勸。法行貴近。而人知所戒矣。其九曰。議政。向者御史建議欲令大臣入內議政。事寢不行。夫人主當總攬乾綱。親決機務。而大裘之領。不可以倒挈。太阿之柄。不可以倒持。凡政事有早朝未及決者。宜日御便殿。使近臣侍於側。大臣奏於前。言官察其邪正。而加糾彈。史官書其言動。以示懲勸。君臣之間。詢謀疇諮。互相可否。以

求至。當此前代故事。祖宗成法也。陛下遵而行之。決於萬機也。益以熟而察於百官也。益以明。聖政益新。天命益隆矣。若乃仍如前日。每事但以奏本進入。旨意批出。臣恐偏聽生姦。獨任成亂。治化無由以底於雍熙也。凡此皆其見於政治者。而尤必以德學爲本。臣請得終言之。其十曰。德學。夫人主之德。欲其知如日月之明。則可以察枉直。仁如天地之大。則可以覆群生。勇如雷霆之斷。則可以收威柄。故中庸曰。知仁勇三者。天下之達德也。而宋賢相司馬光

之告其君仁宗英宗神宗皆以仁明武爲言光之所
謂仁明武卽中庸之所謂知仁勇也然是豈可以易
而能哉必本於學矣成湯之聖學於伊尹武王之聖
詢於箕子曾謂聖帝明王全由天資不假學力哉然
五經諸史之博儒士且未易徧觀而况於人主臣謂
經莫要於尚書春秋史莫正於通鑑綱目陛下宜
留心焉不宜觀其善而避其惡夫善惡兼而觀之則
於君也旣知禹湯文武之所以興又知桀紂幽厲之
所以替而趨避審矣於馭內臣也旣知有呂強張承

業之忠又知有仇士良陳弘志之惡於馭外臣也。既知有蕭曹房杜之良。又知有李林甫楊國忠之奸。而用舍當矣。其爲知仁勇之助。豈不大哉。苟徒若前日。使儒臣誦其善而避其惡。是猶恐道路之有陷阱。閉目而不視。恐魚肉之有餒腐。擁鼻而不嗅。其不至於誤食而嘔噦。冥行而頭質者少矣。伏惟陛下以不出世之聖。當大有爲之時。誠能本於德學。以見於政治。天下之大。尚如金甌之完固。而未缺。臣見國勢可強。讐恥可雪。兄弟之恩可全。祖宗之治可復。而

何難哉臣于冒天威不勝戰懼伏惟擇其言而赦其
罪幸甚

皇明經世文編卷之四十九

陳子龍臥子 徐竿遠闇公

華亭

編輯

宋徵璧尚木 張安茂子美

郁繼垣選士叅閱

王張二公奏疏

疏

王崇之

遼陽時政疏

遼陽利樊

臣聞禦戎狄之道守備爲本城池器械守備之具也將帥士卒守備之人也遼東爲東方重鎮各城有守

備等官有屯宿軍士城池修理之料軍國造作之需各有軍餘造辦既有其具又有其人宜乎軍威振揚武備修舉也奈何邊官廉勤者少貪惰者多不修兵備不恤士卒軍需物料多營於私室練操人力皆疲於私役甚至侵盜賣放之弊不可勝言所以城池失修器械不備士馬疲弊紀律廢弛修理操練有名無實凡遇撫按等官點視指稱修理反又科害軍缺則雇人頂替器械多那借應點惟務遮掩遂爲得計前此之弊在在有之如遼陽一方大鎮也有六衛官軍

有四千馬步、有都司以下統之、有將官以臨之、臣嘗
一一點視、如城中舖舍、多無門窓垛口、問用土坯灰
砌、四月之間、操軍十日、一隊之中、嘗少數人、馬軍可
以調用、步卒疲弊不堪、明甲可以禦敵、青甲不能遮
體、軍馬器械大率類此、推究其故、輒稱邊方多事、未
暇修理、公差數多、卒難備辦、大鎮如此、小處可知、平
居如此、遇警可知、今北虜大衆逼近我邊、窺伺日久、
倘卒然有警、邊備如此、可爲寒心、但積日甚久、無從
稽考、難以一一叅究、往日廢弛、固不可究、自今修整

不可不急乞 勅該部計議行移鎮巡等官嚴督所屬及時修理如法操練士卒謹慎烽堠及將見在不堪兵甲查照舊例 奏請兌換堅完器械替出不堪之數官爲修理既不勞軍置辦亦足遇警克敵仍令各衛今後除軍器有例每年查盤外如盤鐵木植輶瓦灰等料俱資軍國重務每季各將收除實數開報撫按等官以備稽考年終仍委布按二司官員查盤若有短少就將經該官員叅以侵欺之罪其巡撫等官亦要不時點閘如城池器械等項不完者將衛所

官員就加懲治立限完報都指揮以上官任俸督催完日照舊支給操軍數少查有役占者干礙總兵叅副等官一體叅寃如此則法令嚴明人知警懼緩急得以濟用奸弊可以少革矣臣又訪得遼陽山東土人少種田土專一採取人參榛松圍獵野獸爲生數年以來多被本處上司及衛所官員指稱進貢人參等項或借布疋或給銀兩使令部屬官舍到於各寨百般逼迫科擾土人不勝其苦近時因見境內人參榛松缺少不堪又多私役附近軍餘出境採打販賣

皇明經世編

王張二公疏

卷之一

三

平陽堂

○近者奴酋之反亦非遊我林木採參之人

以規厚利常被賊人虜殺互相隱匿不報各處又有等軍餘土人潛將鹽米包裹刀箭甲葉陰於墻下空野去處與夷人易換貂鼠參松等物透泄事情啓惹邊釁多由於此及各衛所官員又指以打採杉木買辦皮張爲由差派餘丁不下五六百名查得每年進用杉木止該十箱人參三百觔狐狸皮張暫時買辦不多衛所官員却乃多方科擾日今前項出產地方被賊搶虜室廬空廢田畝荒涼不能存活正宜厚恤伏望將各項供應暫且寬免以紓民力以革擾害待

賊情稍寧之日行令照舊採辦仍乞轉行本處鎮守
巡撫等官通行所屬嚴加禁約及督令地方墩營巡
守人員晝夜加謹巡察今後如有私役及縱容軍餘
出境採取及將刀箭甲葉與夷人交易致生邊釁者
許被役及知見人等徑赴撫按官處指實首告正犯
旗軍人等量爲枷號滿日與守臺巡哨俱照律例問
擬發落私役官員并地方該管軍職一體叅奏拏問
庶官軍知所警懼下人免其疲勞亦杜邊患之一事
也洪惟 聖朝愛養臣民官有常祿軍有月糧此外

又有折俸鈔貫冬衣布花。思至渥矣。遼東阻山隔海。官軍俸鈔布花。皆仰給於山東河南十一衛。自山海關陸路運到。河南十四衛。自登州海船運到。兩得利便。然河西常勾給散。河東拖欠數多者。蓋以陸路無虞海運廢弛也。查得舊制造有海船一十二隻。官吏奉職。依期運到。雖全伍軍士。皆獲飽煖。近來船隻損壞者。無人修理。鈔布拖欠者。不肯補還。至成化十三年。海運不通。官軍絕望。祖宗制度。廢弛盡矣。以故軍士凍餒流離。缺伍者多。官員剝軍自養。廢職者衆。

信乎其然也。如驛遞鹽鐵所軍俱無月糧止賴賞賜土官達官間有半俸又係無子人數專賴俸給又巡哨守臺晝夜在邊尤爲寒苦近因各處災傷幸蒙

皇上憫念元元遣使發倉賑濟所以固邦本重民命安地方也今邊儲預備少積別無賑濟官軍合得糧餉尚不可得不無有孤恩典查得自成化十二年
前共拖欠官軍俸賞鈔六百一十一萬三千一百七十錠布七十七萬二千六百餘疋綿花二十八萬二千一百餘觔先該撫按官累次奏乞令布政司起倩

夫脚解到每件量價值折銀補還戶部議得陸運艱難節行本司查勘定奪造船僨運補解去後但彼處官員視爲泛常畧不用意夫衣食切於人身不可一日有缺今遲以數歲不能補給致此處有饑寒之苦彼處積無用之地陸路旣稱難來海運見今無船則窮邊官軍何所仰賴哉臣聞遼東舊時收成糧食頗賤商賈販賣易換有無尚不免於飢寒今兵荒相仿商賈少通使軍士號啼饑寒以此饑寒之人不惟難馳鋒鏑之下亦恐生意外之慮合無不爲常例將前

項拖欠鈔布等項。行令山東布政司官存留在彼。就作官軍俸給。查有見在銀兩。照數拆解。或令布按二司分巡分守官買公同估計。量爲便易。委官解送前來。以救邊方一時之急。仍乞將六歲布花鈔貫另爲處置。或暫折收賁銀兩運來支給。候造有船隻之日。照舊海運。如此則邊軍得目前之濟。免饑寒之苦。臣又聞食者民之天。不可一日缺也。故洪範八政。食貨爲先。子貢問政。孔子告以足食爲首。民生最重。邊方尤急。所以戰勝攻取守固。皆賴於此。聖朝舊意。邊

儲因遼東屯種不足，發銀糴買，召商上納。欽命巡撫官以總督之，布按二司官以分管之。柰在前官員職任重大者多好逸惡勞，卑微者惟畏勢貪利。甚有夤緣爲奸，乘機逐利，撒放糠粃穀旦，糴買腐爛倉糧。官銀多歸於富家，錢糧虛報於紙上。近因積弊多端，特命給事中御史等官查盤辨驗，奸弊敗露，一清積蠹。遼軍稱快，但刑罰雖加，而事勢無及。粗腐虛關於食軍未蒙實惠，折追拖欠於富商不肯還官。開地腐爛相積，遼境惡缺糧儲如前。屯等處倉糧不及半年。

之用海錦等衛有十年之積密雲等堡全無一月之
支今遼陽城中每銀十兩止糴米二石五斗前項堡
分每官價銀一兩作米一石或八斗尙少人上納近
因賊情緊急巡撫總理糧儲官不得已恐缺軍餉會
議於定遼金復等處十一衛軍餘輸運動調一萬餘
人往廻一二千里每米一石顧腳盤費多者要七八
十錢少者亦不下五六十錢河東之地遠近騷然各
官雖用心催儹但山澗險阻車輛不通止是牛畜馱
負力疲財殫卒難畢集事勢至此尤爲可恨欲減米

數恐虧損官銀。欲增脚錢。恐庫藏缺乏。卽今傳報聲
息不絕。設若大軍屯駐日久。轉運艱難。逼迫緊急。使
餘軍逃竄山林。疲餓累死。不惟重傷人命。亦且大誤
邊儲。厥後河開農興。尤難爲用。乞 勅該部行移巡
按總理督儲官員。相度賊情急緩。酌量路途遠近。聽
其隨宜增減米數。脚力多方措置。以濟急用。以恤人
難。至各倉拖欠折罰糧數。行令布按二司管糧官。躬
詣各處杖追。先儘犯人財產變賣上納。或令照依時
價折納銀布入官。另爲處置。以便目前支納。俱先定

與限期完報今後整理糧儲亦要斟酌地方庶乎邊備之克修也

疏

張海

安邊方略疏

甘肅邊務

一馭戎以定酋帥甘肅卽古河西五郡之地自哈密爲土魯番侵擾人民奔潰諸夷熟羗來歸在邊安插積聚數年蕃育日多羣犬豕之人而豢養之有識寒心已嘗奏行守臣欲令驅遣因彼逋逃窮虜不可輕

動。至今徙之尤難。況此虜心性叵測。今轉徙日久。不立酋長。未有統攝。異日釀成大寇。卒受其弊。今甘肅等係鎮守分守重地。屯宿重兵。皆有外城分住夷人。可以安輯。防微杜漸。終宜驅出。但未有隙可乘耳。及譯審都督奄克孛刺都督僉事馬亦虎仙等皆可任使。俟哈密平復。設都督一人。命奄克孛刺治事。以馬亦虎仙等分領諸夷。則遠有奠帥之託。近無几席之患矣。一立法以除亂本。訪得哈密夷人馬黑麻打力先使土魯番。因叛附之。尋率番衆入寇。戕殺罕慎。奪

據城池。後冒克番始入貢。歸則糾合哈密諸夷。投順土魯番。殘滅其國。至今一國夷人。怨入骨髓。此賊家歸。有寄在甘州者。乞責令撫夷官。密爲防範。俟哈密恢復之日。錮之本地。以待彼賊。或來歸者。擒之。治以重法。則內以懲剝夷人。外以陰剪土魯番羽翼。禍亂可息也。一重譯以審夷情。中國之於夷狄。其情難知。如得其情。思有以制之。安能爲中國患哉。今訪之土魯番。在哈密迤西七百里。土城大如營者三。小如堡者十六。戈甲不滿三百。軍馬不滿三千。親黨俱亡。止

凡一人與相讐殺。左右親者十一人。與治國事。外無
近番可恃之。國內無中國交通之人。昔狼何欲約匈
奴絕漢。趙克國勅視諸羌。毋令解仇。元昊寇宋。皆野
利天都二將之策。种世衡以謀去之。今土魯番之情
狀事勢。卒難周知。乞勅甘肅守臣。或因其向背。或跡
其虛實。或用世衡之謀。使彼親者相離。或從克國之
計。使彼仇者不解。俟時而動。則虜情前知。廟筭先定
矣。一先計以遏亂。累阿黑麻。踰據西域。交搆叛夷。以
規貢利。昔莎車殺漢所置莎車。馮奉世矯制誅之。鄧

支單于拘留漢使。陳湯矯詔殺之。今阿黑麻殺罕慎。
有莎車之罪。執陝巴。有郅支之惡。臣計此虜。專仰貢
賂爲生。此可以計屈。未可以兵破。若仍務姑息。恐墮
其計中。以占哈密爲利階。以養陝巴爲奇貨。亂將何
時已邪。乞將今之賞賜土魯番使臣衣服銀兩。追回
發甘州收貯。封閉嘉峪關。暫絕西域貢路。將本番使
人男婦拘留。以彰天威。以挫虜志。縱一二人歸語彼
酋。自審去就。責重主將。練兵聚糧。爲經九戍守之圖。
俟此虜款塞求通。果有誠意賓服。上請區處。則內振

之其說誠當朝廷以經界急功海與總兵侯謙俱
下獄然其後至正德嘉靖卒無成功云

閉關弗通以困之也兵口戍守以俟

國威外定禍亂。哈密可復矣。一修邊防以固分守。并肅東州西三路。延袤二千餘里。四當敵衝。盜賊出沒無時。若不因地制利。務爲悠久守備之圖。恐盜賊滋蔓爲禍。不可勝言。臣按諸路或當增築墩牆。或當修理壕塹。動有數十百里。取水之路。遠者或四五十里。工程浩大。必歲久乃可成功。乞勅甘肅守臣督官於農閒之時。漸次修理邊防。或地有沙石者。用古植木立柵之法。或水路不通者。用他邊窖水之法。使營壘相望。哨守相聞。靖虜安邊之計得矣。一預調度以足

兵食甘肅地遠寡援。一有警急。赴京請兵。往回萬里。及調客兵。緩不濟事。邇者議調陝西洮河岷之軍策。應尋復中止。然寧夏雖近涼州。係腹裏邊方。洮河岷雖近莊浪。係腹裏地分。官軍用之。有名無實。惟延綏之軍。生長邊陲。諳識戰陣。乞勅延綏守臣。請選遊兵三千。本鎮操守。專聽甘肅調用。及行戶部區畫糧草。務足主客兵五萬人三年之食。則足食足兵。久駐之基也。

言阿黑麻事宜疏

阿黑麻貢使復來。而陝巴尚未歸。城池尚未復。臣謹遵成筭。凡阿黑麻所貢方物。盡數驅逐出關。示以絕意。其前次貢使寫亦滿速兒等一百七十二人。仍舊拘留不遣。原給賜阿黑麻并使臣祿段諸物。悉貯之官庫。當日卽封閉嘉峪關。暫絕西域貢路。此後如天方國。或撒馬兒罕使臣來貢。仍左驗放入。其來自上魯番者。一切拒之。萬一阿黑麻自欲送死。則我邊將士及哈密之寄住苦峪者。自有以待之矣。臣自至甘肅以來。苦峪城池修濬者數百丈。哈密甘涼地方諸

夷徃居苦峪者已二千餘人其行者有所齎來者有所止耕者亦頗有其具矣

皇明經世文編卷之終

皇明經世編

王張二公疏

甘肅邊務

平露堂

皇明經世文編卷之五十

華亭

徐孚遠闇公 宋徵璧上木

選輯

陳子龍臥子 沈 泓臨秋

張 密子遐叅閱

張方洲集

疏

張 寧

乞省買辦疏

省買辦

方洲為名給諫

英宗復辟後甚重之缺欲擢用

近因買辦煩重該順天府宛平縣奏稱大興縣地方

吏部已據商中

疏上不許欲待北都行缺敘用

廣濶鋪面數多本縣地方稀少鋪戶消乏乞踏看多

寡均平買辦奉

旨著戶部整理欽此臣聞此令一

季方先生各得聖旨以去

下物議喧騰謂將減宛平之常科加大興之新額以

近事言之似為可用而節財裕用之本則未盡焉切

京師四方幅湊之地尤不宜輕有追呼也

照連歲四方多故水旱相仍糧道方艱倉儲未實而

京師物價不甚踴貴京民未甚窘迫者政以買辦交

通商賈四集有無得以相通匱乏得以相濟也若准

所奏差官踏看則必搜求攀指彼此互持切恐貨易

之家咸懷疑懼徵發日甚息本不克居者閉門行者

散去買遷之源不行物產之來漸少官司又復點按

常額一體催科物價之踴貴可期京民之窘迫可待
況今歲秋收四方未卜加以畿甸根本設或多虞其
非所以宅中御外之勢也且今日宛平告乏旣歸之
大興倘他日大興告乏歸之何地是猶割股充飢腹
不飽而股就廢矣臣聞古之域民或廛而不征或法
而不廛市宅貨易本非爲官而設比論爲切事昔曹叅入相屬齊
後相無攪獄市其後卒成清淨之治伏望軫念民艱
思近圖遠省用裕民凡朝廷祭祀宴享賞賚兵戎
軍國重務遇有缺乏量給官錢均平買辦其餘齎離

賜予營造服御不急之務。得已之征。無名之費。悉宜停罷。以甦民困。不必差官踏看。

乞除調帶俸軍職

除調帶俸軍職

查得在京各衛武職官員帶俸等項數多。有一衛二千餘名。有一衛千五百餘名者。通計不下三萬餘員。

帶俸隨撫等官不

每歲共支食米三十六萬餘石。折俸銀四十人萬八

宜。張積。原。師。並。一。年。歲。儲。其。後。嘉。靖。中。胡。為。政。亦。備。

千餘兩。若併胡椒蘇木折鈔。總計動經百萬之數。糜

又之

耗錢糧。莫此為甚。臣聞戰備攻守。士卒當前。但使主

將得人。不必多官給擾。况其間多有老病怯弱。騎射

生疎之人。旣無差調。又無掌骨。徒建虛名。以支實俸。積歲彌年。何日爲了。見今府庫告乏。四方飢饉相仍。平時錢糧。仰給去處。多因停免。節財慎用。正在此時。今乃以有限之資。而供無窮之費。設若少有緩急。財賦不繼。京師百萬軍儲。計將安出。臣訪得天下都司衛所官員。多有事故。及在前至今員缺不行申補。亦有曾經申奏。未蒙調撥者。以此千百戶所印信多令。總旗人等護掌行使。以致奸弊百端。軍無紀律。乞勅兵部計議。照查各處員缺。將前項帶俸官員內除應。

合存留備禦者不動外其餘相應除任者照缺量行
調補各處都司衛所管事如此則在外無曠官之弊
在內省冗食之憂事體人情兩得其便若能減去一
分則京師有一分之積矣

鄉試時劾奏

劾陳王二輔

切照大學士陳循王文職居輔弼任重經綸所當正
已正人爲上爲下而乃以子之故紛章疊奏煩瀆聰

然而累累登登意亦綠此小事請其爲人

明祗爲私謀不恤國體大臣之道果安在乎臣等聞
宋范質爲相從子景求遷秩質作詩戒之曰爾曹當

閱我勿使增罪累。比之陳循、賢否何如也。韓億爲相，其子維舉進士，不就廷試，蓋以父任執政爲避。比之王文高下何如也。沈文通登進士第一，馮京第二，時以貴胄不可先寒賤，乃進京而退文通。比今文卷已落，而求與中卷比對者，得失何如也。世之庸人愚婦，亦知不談子德，有所失則歸過而反責之，豈有身爲大臣元宰，公爲其子，暴才稱屈于朝廷之上哉。即使才而屈，猶不可也。况無實之爭，何以服天下。且今歲順天府就試者一千八百餘名，而中試者僅一百

皇明經世編

卷之一

四

三十五名、劉儼等借使考試未精、則其間遺漏者、亦未止王倫陳瑛設若一槩援例求進、拒之則情偏、從之則弊起、是陳循等一舉而壞科目之制矣、仰惟

陛下優禮大臣、准令會試、恩已極矣、而循等乃欲將劉儼等問罪、以文其奸、臣等聞樹德務滋、除惡務本、用法不可以太寬、太寬則犯之者可幸免而不知懼、施恩不可以過當、過當則得之者以爲易而不知感、循等殺公濟私、要君脇下、其所存施、非止一日、今情狀自敗、罪犯已彰、大小人心、莫不共怒、但畏其勢而

不敢言耳。陛下若又待之以寬，施之以恩，而不絕其根柢，則循等愈無忌憚，乞將循等執送法司，明正其罪，罷歸田里，別選文學公正之臣，以居內閣，用昭輔弼平明之治。其王倫、陳瑛，仍照不中生員事例，一體發回原籍讀書，下科各就本處應試，則科目有定制，遠近無異法，人不苟求而真材斯出。

書

答陳彥章

處州山寇

凡制師破敵，莫善于自重，莫不善于自輕，以敵爲重。

則吾自備者亦重。以敵爲輕。則吾自備者亦輕。自重者。始能匿其機。終能輕敵。自輕者。其始先失其機。終以敵爲重矣。孔子曰。必也。臨事而懼。好謀而成者也。生於勝敗之微。在重不重之間耳。夫處州一隅。其流毒不爲不甚。其於藩鎮不爲不近。出將遣師。不爲不專。且久。其曰士卒不勇。猶有所歸。苟徒曰山川不可用武。設使鴟義矯虔。負固益甚。終不然。則棄其地耶。披巉履險。莫若劍閣。而鄧艾破之。倚山靠洞。無甚幫源。而童貫破之。在得人何如耳。古人用兵。告之衆人。

叅之天時、吉而後舉、況乎以新乘之師、而入險危之地、正宜按兵輯旅、士伍戒嚴、擇善地以安之、賊雖跋扈、未敢窺也、今以裨將支兵、脫甲冑刃、輜重扼其前、援兵斷其後、營壘未成、號令未施、而賊已與之接、雖有智者、亦無及矣、夫將莫難于兵之所恃也、莫重于賊之所畏也、有將如是而不自重、賊其有不逞、人其有不怯者乎、所謂敵人之來、蕩蕩無慮、此必破之機也、不此之慮、而傲然輕進、匹銳旣倒、餘鐵頽然、卒至我師喪氣、無復取鬪之心、賊勢益張、人心益懼、其原

皆起于自輕。此用兵之失一也。兵之識敵。猶醫之識証。察其腠理。審其血脈。望聞問切。必得其源。投之一匕。可坐而起。苟寒則溫之。熱則涼之。因襲陳方。罔知腠理。吾見其能灰病者矣。賊以乘勢。方欲連兵。吾以前目之鑒。正宜撫慰衆心。坐定謀慮。布既往之過誤。示將來之可圖。相幾度義。遠攻近取。見其來而弗怖。舍其去而弗追。遊哨其隱伏之區。窺覘其出沒之路。以逸待勞。以靜制動。畢知其情。然後出奇設伏。以圖之。所謂知其廣狹。盡其淺深。乃可爲奇而勝之。此擊

險之法不此之慮而恬然自居○別一將○用兵○不○知○安○今日出一兵猶前日○計○往○往○皆○然○之兵也已損其一明日出一兵猶昨日之兵也又損其一陽氣之駁陰氣之蝕也卒至折車倒轂馬困兵疲而賊尚自若未嘗不由於無謀此用兵之失二也夫威與信兵家所恃以爲藩籬者也然必信立而後威有以行未有威不能制而可誘以信也故名將之臨敵欲致人之死必容人之生諭以利害誘其順從如不用命兵且加矣若夫猶豫不決進退狐疑既慮信之不行又懼力之不贍執已之疑而欲人之無疑

不可得已。及其鋒力既挫。然後一切以招撫爲辭。彼雖至愚。獨不知此耶。今乃番然自來。略無回互。此正天與之機也。正宜固其酋首。招其部曲。開心見誠。以申彼此之情。披肝露胆。以釋疑懼之意。呈乞詔宥。以安其心。復其居。繼其業。有幹有年于茲。然後誅首惡。以申大法。則餘黨不復疑矣。而乃欣觀快執。若獲大捷。威旣不行。信復不立。將何以固衆志哉。此其失三也。夫士卒將之所恃以爲手足者也。將之所麾莫不從移。將之所指莫不前死。用之有道。處之有法。則寡

可敵衆。弱可敵強。用之無道。處之無法。雖衆且強。無益也。在今日。宜勞之以禮。勸之以義。明生靈無辜之冤。以激其心。舉從事跋涉之勞。以慰其勤。使知將之愛其命。惜其死。無不感憤。爭欲自効。然後信賞必罰。以勸其功。立期定會。以要其成。則人皆知進死得生。退生必死矣。若天因人迫已。然後驅而陷之。死地。賞不徧及。罰不致嚴。營居無同甘共苦之人。臨陣無勇敢當先之士。昔李晟以孤軍而破強敵。謝玄渡淝水而破秦兵。豈勢均體敵而然有以厲臨士卒故也。此

於處州何如。此其失者四也。蓋將士勵所以成其謀。處置宜所以行其謀。自重者必知有謀。而自輕者未嘗知有謀也。惟一失其機於營壘未定之時。而人心無不自危。再失其機于狼犬自投之日。而賊心始期必死。以自危之兵。而捍必死之賊。此愚所以深惜其自輕也。雖然。姑自前日論之。彼賊之負固不服。初不過乘南賊之亂。恃標掠之富。依山道險。輕吾兵之無略而已。今南賊既破。則聲勢倒矣。南師既還。則士氣益矣。久禦我攻。則欲掠無所矣。力過德踰。則山川不

足恃矣。脾券一呼。行伍響應。數卒發勇。羣賊奔潰。則彼此之情見矣。其所以堅持不服者。特以叛逆之餘勢。不可復生。與其歿於彼。不若歿於此。故也。今皇上以天地好生之仁。降賜綸音。使之自附。如天地之於萬物。一於長育。而悍疾忿戾。有不暇顧。誠聖人之心也。設使天詔遲之數日。不下。愚不知其成功果何如也。雖然。猶有一焉。竊聞虞書曰。分背三苗。周書曰。除惡務本。在今日。雖無事矣。尤當以此爲意。

疏

齋醮進香

諫止進香

本之目黎表

臣聞釋道之教，遠古所無，下至漢唐，其法寔盛。然三代君主壽考，世運靈長，後世衰亂相仍，年祚少永，佛老無補。視昔可知。夫父子君臣夫婦兄弟朋友長幼人之大倫，自古體國立法，修政建事，無非爲此五者，而爲之經理防範耳。五者順序，百度以寧，是以聖人之道，始於有爲，而終於無爲。彼佛之法，不足以有爲，而強于無爲，遂欲去君臣廢夫婦，一切埽諸虛無，宋滅，假使其教盡行，則婚姻既無，子嗣俱絕，不過百

年人類盡矣。雖有事物將誰用之。歷代英君誼辟。有見於此。非不欲深惡而痛革之。特以其頗能以禍福輪迴之空談。警動于人。可以化導愚昧。姑將存之以爲治化外之一術耳。非真謂其能扶世立教。延永國步。而爲之崇奉也。恭惟皇上。曩在青宮。繼登大寶。夙精儒學。日御經筵。於凡治亂之由。正邪之辯。洞明深識。允蹈躬行。當卽位之初。詔天下寺觀不許藏匿無度牒僧道等項。尋承睿旨。不許增修寺觀。乞請額名。上書言事者。又每以濫度呌化不便爲詞。多

被獎納傳之將來固當永遠無弊矣邇者恭遇 皇太后誕日令僧道建設齋醮此見 皇上將欲表揚孝道慰悅 聖慈無所不用其極之心也諸大臣及百職事但當和衷助德仰贊至情上綏懿祉則心誠道得允合舊章而禮部尚書姚夔等乃於各衙門歛會財物收辦炷香約以至期赴壇行禮爲儒者自失其守業彼者烏知其非臣雖至愚爲此深惜切惟人臣之於君願其福也則當勸以修德善願其壽也則當勸以去逸慾願天心之向順也則當相之以和保

小民康濟四海故曰求福不回天壽平格又曰欲王
以小民受天永命未聞有以禱祠得福丹藥致壽假
符瑞以永天命者今乃不能盡所當爲徒以辦香尺
楮列名其上宣揚于佛老之神相率而拜曰爲朝
廷祈福祝壽天地鬼神山川河嶽昭布森列可厚誣
如是哉昔孔子之於異端孟子之於楊墨韓愈歐陽
修諸儒之於佛老爲其惑世誣民充塞仁義故詞而
闢之論而排之今若此其流不止於惑與誣矣通朝
之人靡然相從仁義不止于充塞矣學聖賢之學者

既不能闢而排之、又不能以正自處天下後世謂之

然則此疏

憲廟初所上公于時亦

何哉、伏惟

英宗睿皇帝當復位之初、國事多虞、屬

將外轉矣

有足疾、其時一二大臣所見不遠、不察古人行禱之

意、故嘗舉行此事、蓋一時臣子迫切至情、事不得已、

然非祖宗之舊典、先帝之本心也、因循至今、實

意不存、尚沿故習、夫臣之於君、猶子之於父、一指一

髮、皆其長養、一飲一食、皆其賜予、若能以齋醮助國

雖殺身亦所不辭、豈敢自以儒者門戶、爲此倔彊、與

彼相較量哉、但以無益事情、徒傷大體、其于經筵

聖學不無略有所效，其于進講儒臣，亦恐難以身勸。
伏望 皇上法古昔聖賢正常道之心，監大學衍義
明道術之語，乞勅禮部及文武衙門，今後凡遇慶賀
日期等項，不許仍前擅備炷香於寺觀行禮，庶可以
扶名教，振士風，全一代之治體，而與三代之時並隆
矣。

碑

海寧縣障海塘碑

海寧障海塘

海寧古鹽官縣，瀕海南上，有山名赭，赭南遠有山對

皇明經世編

張方洲集

海寧海塘

三

平露堂

峙如門是爲浙江受潮之口。歲久沂泗渟滯，赭淤出
渾若墮，則口隘潮來，仄擊于塩官隈岸。宋嘉定中，潮
沒衝塩官平野二十餘里。史謂海失故道有由也。咸
化十三年二月，海寧縣潮水橫濫，衝圯隄塘，逼盪城
邑，轉眄曳趾頃一決數仞，祠廟廬舍器物淪陷略盡。
郭不及者半里，軍民翹隘奔顙，皆重足以待。縣上其
事於府，府守陳上其事于欽差鎮守太監李巡按監
察御史侶。二公以所上事詢諸三司，布政使杜按察
使楊又以二公命各詢其佐，咸集厥地，周視翕謀，區

畫會計相與祭於神具以成業托分巡僉事錢曰君
宜任重有所給乏從華惟君自處公乃躬履原隰量
材度宜命杭湖嘉興官屬因地順民採石于臨平安
吉諸山物用林積刈楫轉挽蔽河而至分命把總指
揮李通判何兼摠工役初用漢健絙法不就乃斷木
爲大櫃編竹爲長落引而下之汎濫稍定人知有成
勢皆奮趨事計以日費致月工填壘稠復爲力漸易
業可待就時盛暑公有念曰吾聞聖禹治水奏鮮定
賦非但疏泄而已今民蕩析未寧農稼方作飢勞野

皇明經世編



卷之一

三

聚必有疾疫未可亟也。由是作治雖嚴。間輒撫循勞
來失次者。徙寓空舍。惠以薪米。大集醫藥。以療病者。
作副隄十里。衛灌河以防泄鹵之害。義聲倡道。富人
爭自振施。民至是始忘死徙之念。歲八月塘成。適沙
塗壅障其外。公因增高倍厚。覆實擣虛。使腹抗背負。
屹成巨防。而海復故道矣。是冬舉羨餘之財。修葺文
廟。增廣學地。重建按察分司。致祭告成。公乃復。邑父
老過相語曰。昔元延祐海患。財力大艱。時官寡謀。誣
以異術。今之深妙鉄神遺跡近在。吾少歲猶見大父

行於悵流涕而道其苦辛者。皇朝永樂九年海決
有司不時治民流移者六千七百餘戶淪田一千九
百餘頃事聞遣保定侯孟英等力役蘇湖九郡貲累
鉅萬積十有三載其患始息此吾輩耳目所及者今
錢公以一騎行邑歛不及民勞不靡衆徒以三府萬
二千人僅七越月而績用聿成患大費省力少效速
較之前事孰與此賢方首事之際振撼倉皇若遇勅
敵雖有優才絕力當亦不暇旁顧公能發心蘊竭性
能紓徐委曲以底食我以調濟我以成我稼穡以寧

我婦子。凡吾輩。今日得以復安此土者。皆公賜也。奈
之何。泯沒其德。遂相率具書幣。走徵予文。刻石。予念
風濤漲溢。凡際海之區。無不間遇。至於衝決激射。惟
浙江地勢。爲常。自延祐及今。纔百五十年。海已三變。
雖日氣數消長。未嘗不以人力定勝。但恐物非天成。
終當復故。使赭山之潭復出。沙塗之壅再去。後之繼
任非人。文獻無攷。則父老前日之憂。將或在其子孫
也。

皇明經世文編卷之

皇明經世文編卷之五十一

萃亭

陳子龍臥子 宋徵璧尚木

編輯

徐孚遠闇公 何 剛慤人

錢爾進及甫泰閱

劉文和集

疏

劉 珣

慎服食疏

服食

憲宗時頗尚方技多傳陸

臣風聞近日內府有術士造紫霞杯者蓋紫霞杯以

之官此其類也

硫黃爲主本草云硫黃太熱有毒夫五臟柔脆只宜

皇明經世編

劉文和集

慎服食

平露堂

卷之一

平和不宜餌此燥烈之物、况金石之藥、古人所忌、硫黃硃砂此正金石之藥也、皇上春秋鼎盛、聖體方強、臣恐術士巧飾虛詞、有以此杯進御、一或用之、倘有後患、追悔莫及、臣子之心、日夜憂惶、伏望皇上念祖宗付託之重、萬幾之暇、清心寡欲、靜以頤養、則血氣自然平和、可以無疾、凡一切熱補之劑、悉宜峻絕弗用、醫書云人年五十以前、不可服補藥是也、乞將造杯之人、斥逐于外、無使出入內府、焚或聖聽、臣不勝惓惓納忠之至、

免立五嶽廟碑疏

五嶽廟碑

竊惟唐虞三代時、五岳視三公、四瀆視諸侯、其餘視伯子男、至秦漢以後、始有封禪、或封元帥、或封王、或封帝、崇名美號不一、至我太祖高皇帝、以爲岳鎮海瀆、自天地開闢、英靈之氣、萃而爲神、豈國家封號可加、瀆禮不經、莫此爲甚、前代封號、盡行革去、止以山水本名稱其神、一洗萬世之陋、若立碑必頌神功德、正詔書所謂瀆禮也、非祖宗之意、况神不享非禮、孔子曾有泰山不如林放之嘆、我朝祖宗不立

者。恐褻瀆故也。今莫若每嶽鎮海瀆。各頒賜一勅。令有司歲時修理祠廟墻垣供具。選委本處道士四五人。看守焚修。仍給田百畝。或五十畝。爲香火之需。載在勅內。令永久遵行。庶廣朝廷以禮奉神之意。

遵舊制以安人心疏

諫罷西廡

竊惟東廡之設。實自太宗皇帝。建立北京之初。專爲緝訪謀逆妖言大奸大惡等事。止令內臣提督之。犯干法典。仍下所司寃治。此亦當時權宜之制。一向因而遵行。未曾敢易。近日京城妖狐夜出。人心驚惶。

卽點膏也

皇上特設西殿官校暫令太監汪直提督緝訪用戒不虞以安人心臣聞自立殿之後事情紛擾人心反至不安其于國家安危關係非小伏望聖明洞察事機特將西殿革罷官較悉回本衛庶使舊制不爲變亂而人心自安臣已與同官論奏未荷俞允故不避震怒再此申瀆臣無任待罪納忠之至

開言路疏

言路

臣聞宋臣蘇軾曰天下治亂出于下情之通塞至治之極至于小民皆能自達大亂之極至于近臣不能

自達易曰天地交泰其詞曰上下交而其志同又曰
天地不交否其詞曰上下不交而天下無邦夫無邦
者非真無邦也雖有邦而亡之形具矣臣不敢遠引
前代明王遇災求言之典伏惟我太祖高皇帝臨
御之時自公侯以及守令下至軍民匠役諸色人等
皆得言事其言中理卽爲施行且或予之官或給之
賞言不中理亦置而不問蓋誘人使之言也猶恐人
不得盡言再設登聞鼓于左右長安門外應有可言
之事許直至御前陳說所以廣耳目不偏聽防壅蔽

而邇下情也。故當是時雖閭閻之間細微之事無不周知。天下太平。良有所自。洪惟皇上嗣承大統。卽詔天下凡軍民利病。許諸人直言無隱。臣有以見皇上之心。卽太祖高皇帝求言圖治之心也。夫何十數年以來。以言而行賞者固有之。以言而得罪者亦不少。夫在古聖人。獎人使言。人尚不敢。況加人以罪而孰敢言哉。卽今妖物傷人。京城騷動。人持兵刃晝眠夜作。說者曰此陰盛之狀。又曰此胡虜將來寇邊之兆。延今半月之久。無一人敢言。豈非顧望箝結。

于平時哉。設若有甚于此，亦孰敢言。或得禍亂，不言可知矣。伏望 皇上廓宇宙之量，容涓滴之微，詔六科給事中十三道監察御史及一應官吏軍民人等，明言致災之由，殄災之策，不復忌諱。皇上俯垂霽覽，虛心聽納，如所言果中，卽賜施行，以興政治，以厭群望，如所言不中，亦望姑容。如是則言路開，君子進，小人退矣。萬事何憂不理，災害何憂不息哉。

記

濟寧中新聞記

濟寧新聞

濟寧郡南河曰會通。元人開以漕運者。自濟寧分水
閘。至東昌臨清。凡四百餘里。久而淤塞。國朝永樂初
年。詔大臣率民夫往濟之。其濟寧則引泗洸及徂徠
諸山谷水注焉。以後通行不易。然而官舸商舶。鱗集
麻擁于濟城之下。在城天井二閘。有不能容。肆于二
閘南。穿越河。可四里許。更益以閘。曰上新。下新。數十
年來。人雖爲便。然下新閘之上。幾二百步。舊有小水
橋。鐸石以岸。中僅二丈餘。上新閘之上。有濟安橋。中
流石堆屹立。篙工機師。至此皆駢臂束肩。瞪目不敢

前前此司運者不知其幾漠然以爲秦越乃成化甲午秋平江伯合肥陳公志堅督運過此步自堤上相厥地勢詢知宿弊遂與都憲李公自得議曰斯橋斯堆弗夷斯舟弗良于行乃檄東臬憲副陳公某卜吉倡屬具舂搗列繩鋪撤其橋去其石堆披材輦壤撥腐曝淤培高卽卑疊石爲址琢石爲柱覆石爲梁直上下新之中增一闌焉首事于乙未二月奏功于四月旣成名曰中新中新之上爲拖橋一易濟安爲渡舟二於是水陸無滯往來之人咸稱曰快凡糜錢十

九萬四千餘、夫丁千餘、木石以數千計、他百色之需、以百計、財、因素蓄、民不告勞、爰是工曹主事儲公明、謂斯傑跡、雖由衆力、造端托始、則實志堅、不可不刻、文于河澣、以昭示永久、因以言見微、夫自漢初用蕭、何計戶轉漕、而有漕運之名、自唐則天用李傑爲水、陸發運使、而有漕運之官、歷代官設不一、漕法亦異、而建都亦不同、如漢漕仰于江淮、宋漕仰于汴、元漕仰于會通、衛潞以其邇于都、時然而然也、我國家遷都于北、蓋漕元人之漕者、自永樂初年、以迄于今日、

皇明經世編

劉文和集

卷之一

平靈堂

此漕不易志堅大父恭襄父莊敏公調度經營河道清肅餉運不乏卒之上裕國用下福生人至今江浦臨清人爲祠之碑之足以耀當世而芳千古矣

鎮戎千戶所記

鎮戎千戶所

陝西于天下爲雄藩臨戎控虜而中國之警自秦以來無虛歲其間制御之術攘却之功隨時代爲強弱可考見矣開城在平涼爲屬邑北去縣治若干里其地衍沃肥厚而居人多事耕牧舊有城基尚存相傳以爲范文正公禦李元昊諸砦堡之一紀志雖無徵

要亦云然南有黑水口海刺都魏王城韋州花馬池
寧夏中衛其北則接西安州乾塩池打刺赤靖虜衛
周圍險曠數百里醜虜竊發往往至此亦實要害處
成化丙申巡撫右副都御史西蜀余公子俊建白欲
設置千戶所守禦于其地事未舉以兵部大司馬召
赴京越三年庚子右副都御史阮公勤爲巡撫時整
飭兵備按察司副使王繼以前事聞上以爲然未
幾繼陞山西憲使去而繼兵備者副使翟廷蕙實相
與共圖之方伯魯能憲使左鈺相與始終之于是因

遺址循定制築壘焉、甃瓦陶諸野、木石採諸山、兵民若干、並力偕作、晨夜罔倦、工未就緒、庭蕙丁內艱去、而副使孫逢吉、乃始繼成焉、城高凡三丈、圍僅三里、門止設其一、易防守也、千戶所置于街之中、而又置憲司行臺于所之東南隅、公館倉塲營舍、皆以次而成之、又設墩臺若干、隨山就險、以便瞭望、以開城在宋屬鎮戎軍、故仍擬其處曰鎮戎、其經始自壬寅夏四月、而告成之期、則癸卯秋八月也、阮公以城旣修、而邊有備、不可不書、乃乞文于某、某嘗考宋史矣、昔

夏人爲患茲土、往往有可除之勢、然機每至而宋不
之省、識者不能無憾焉、方繼遷不臣、勢猶未橫、固宜
一奮而搗其巢穴、人心斯快、宋不能然、固矣、若乃繼
遷中流矢待死、自度孤危、將不免于宋取、乃屬其子
德明、以歸宋爲請、豈得已哉、當是時、宜復合番漢之
衆、而壓其境、覆其人、此機也、而宋失之、卒至元昊勢
焰紛紛、橫不可遏、而寶元康定之間、極矣、其後元昊
死、諒祚幼弱、政專外族、當是時、可行間說、捐數千金
誘其親密、或許授節鉞、以啖其部將、使內自分亂、乃

引兵而促之。可以得志。此亦機也。而宋人失之。卒至于終宋之世不能去。或曰。宋不敢有加于夏者。以有契丹也。是不然。契丹嘗以党項故。于夏有怨者累年。是時使宋外假契丹。而擁兵西向。責以負恩背約。叛服不常。不惟威夏。而契丹亦有警。不知出此。而乃復加冊封。苟安目前。嗚呼惜哉。大抵宋之爲國。武不勝其仁。疑不知其斷。而志不足以振其氣。是以隱忍養寇不耻。蓋宜矣。君臣之間。相與內修外防。孜孜求治。而仁宗得以賢君稱。亦可嘉哉。若夫我國家以武功

定天下、混一疆宇、奄有甘涼、而戎虜不敢以犯天誅、固非區區有宋者比、然余以爲爲文正公經畧處、故因以宋事言、以見我 朝廷之所以盛也。

重修大小清河記

清河

維青之區有河曰大清曰小清、小清之源出于歷城之趵突泉、中匯清潔孝婦諸水、東北抵樂安高家港達于海、大清則濟水渠也、自東阿之張秋東北抵利津富國鹽場、達于海、往年舟楫浮于二河、商鹽徧于齊、諸道水利鮮與爲儷、自永樂初堙塞不通、水失其

徑一值天雨、茫茫巨浸、壞民田廬、弗以數計、乃成化
癸巳冬、叅政唐源潔分巡海右、言於巡撫都憲牟公
曰、今二河爲患、守土諸君子、以頻年饑饉、民不任勞
爲辭、彼不知救荒之中、有可以興利者、役民之中、有
可以濟民者、惠而不知爲政、惡在其爲民父母也、疏
河之責、某請當之、敢告都憲公曰、事當豫圖、斯無患
豈直二河、凡東藩六郡、罹水患之處、卽率屬理之、無
食之民、食而役之、庶上下兩得、吾知若必能辦此、其
行無惑、源潔遂躬任其責、焦勞靡寧、擁節宵征、相視

地形令水工準高下。自歷城濬至堰頭。又至樂安。小
清通矣。自張秋濬至平陰之滑口。大清通矣。大小清
既通。水循故道。退出鄒平等邑。膏腴可耕之田數萬
頃。民用大悅。其河水備淺。又置瀦水閘。防深置減水
閘。閘旁各鑿月河。摠疊閘二十。濬通水路五百二里。
所役卽無食之民。當賑濟者。每人日給米三升。賞錢
若干文。民凡百萬七千四百四十名。米一萬六千五百
十石。錢一百九十八萬四百文。復慮倉廩空竭。措置
戶口鹽五萬引。俾鬻諸商。得銀若干。易米以補前米。

易錢以補前錢仍以鹽之羨利爲一切傭工造閘之費是役也財不出于官不取于民而濟青之善利以完青船入于濟濟船入于張秋東西轉輸之人大稱曰便以甲午二月始至十月告完厥功旣成都憲公爲疏源潔修河之勞于朝公卿大夫罔不稱善某東人也尤便之自夫泄荒之世天地人並位未嘗理水事理之自唐虞始以人而任天地之責所謂經理山川古聖賢第一功也移天時變地力取不窮用不竭旱不災饑不困萬世之計也缺焉補之乏焉繼之一

方之入、纔足一方之出、天下之產、僅供天下之用、國可靜也、可逸也、不可動也、不可勞也、靜以逸、固不至虐歛、靜而勞、則難免厚賦、一時之計也、夫二河之力、本天地自然之利、或者以爲窘于堙塞、迫于歲饑、若終不能爲者、賴都憲公獨知遠覽、預定事機、多方設法、旣息小清之患、并通大清之波、二河如一水之周流、斯民歷年荼毒盤剝之苦、一旦告除、非萬世之利而何哉、